

ARLeF: “Flon Flon & Musute” impreziosît di vôs e musiche intun video

Un gnûf strument dedicât ae infanzie par mantignî vîfs i valôrs de amicizie e de pâs

Il libri “**Flon Flon & Musute**”, la edizion furlane di “Flon Flon & Musette” di Elzbieta, vincidôr dal premi Andersen intal 1996, al devente cumò ancje **un biel video animât a disposizion di fruts, gjenitôrs e insegnants**. La impuartante iniziative, prime editoriâl e cumò filmiche, e nas de **colaborazion tra la Associazion culturâl “El Tomât” di Buje e la ARLeF** - Agenzie Regjonâl pe Lenghe Furlane che le à finanziade.

Il video, delicât e emozionant, de durade di 6 minûts, al è stât ideât di Leo Virgili che al à ancje componût e sunât lis musiche; la vôs che e conte e je chês dal atôr Michele Polo e lis animazions dai dissens originjâi di Elzbieta a son par cure dal regist e videomaker Francesco Baita.

“Flon Flon & Musute” al conte la storie di doi cuninuts amîs che a zuin simpri insieme fin al dì che e scolepe la vuere e no puedin viodisi plui parcè che Musute “e sta di chês altre bande de vuere”. La autore, Elzbieta, e je une scritore e ilustradore polache che, intal 1939, e scjampe de vuere e si plate inte Alsazie todescje. E passe dopo un lunc periodi in convent in Ingletiere e, infin, a 15 agns, a Parîs. Intal 1972 a vegnin fûr i siei prins libris, seguîts di tancj altris, ducj impegnâts sui temis di dai plui debii e cuintri la vuere. La version in lenghe furlane e je stade curade de mestre Laura Nicoloso partint dal originjâl francês “Flon Flon et Musette” e e je stade publicade intal 2015 de Associazion culturâl il Tomât simpri cu la poie de ARLeF.

Dongje dal libri distribuît de Associazion, la version animade e musicade in **video, visibil sul sît de ARLeF (www.arlef.it)**, si propon tant che un gnûf strument educatîf e didatic, profont e di cualitât, par promovi tra i fantats il valôr de amicizie, de pâs, e ancje come supuart al insegnament de lenghe furlane, in plui che par fâ tornâ a emerzi contis di vitis vivudis e tramandadis intune tiere di frontiere, plene di memoriis di vueris, invasions e profugancis.

Udin, ai 28 di Jugn dal 2016

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<